



INUIT ATAQATIGIIT INATSISARTUNI

Ulloq: 30.07. 2008

Inatsisartut Suleriaasianni § 36, imm. 1 naapertorlugu Naalakkersuisunut apeqqutit imaattut matumuuna saqqummiuppakka:

“Nunatsinni uumassuseqartutigit pinnguutit sananeqaatinik kaanngartiteralutillu katiterisinnaasut iluaqutiginiarlugit ingerlatseqatigiiffimmik pilersitsiniarluni suliniutit sumut killippat?”

(Inatsisartunut ilaasortaq Josef Motzfeldt, Inuit Ataqatigiit)

Tunngavilersuut:

Inatsisartut inatsisaanni nr 20 novemberip 20. 2006-imeersumi aalajangerneqarpoq naalakkersuisut piginnaatinneqarsinnaasut Kalaallit Nunaanni uumassuseqartutigit pinnguutit iluaqutiginiarnerini nunatta piginnititut pisinnaatitaaffii ingerlatseqatigiiffimmik pilersitsisoqarpat tassunga tunniussisinaanissaminnut.

Ilisimavara taamanikkut Inuussutissarsiornermut Pisortaqarfusoq piffissaq 2003-05 Danmarkimi Bioteknologisk Institutimik, manna Bioneer A/S, isumaqatigiinniuteqartoq iluaquteqarniarluni ingerlatseqatigiiffimmik NunaBiotechimik taallugu pilersitsinissaq siunertaralugu.

Tamatuma kingorna suliaq ingerlateqqinneqarsimanersoq tusarsaanngimmat paaserusuppara Namminersornerullutik Oqartussat ilumut suli taama niueruteqarnissamat peqataarusullutik soqutiginninersut.

Ilanngullugu paaserusuppara taama ingerlatseqatigiiffimmik pilersitsisoqassappat innuttaasut soqutiginnittut ataasiakkaarlutik, kalaallit danskillu pisortatigit suliaqarfii aningaasaleerusussinnaasullu peqataatinneqarsinnaanerat isumaliutinut ilaanersoq?

2004-mi Bioneer A/S-ip peqataanini annikillileriffigaa.

Ukiut kingullerpiat ilisimatusarnikkut ingerlatsinertigit pasitsaanneqarpoq uumassuseqartutigit pisuussutit iluaqutiginiarmissaannut suli periarfissarpassuaqartoq. Soorlu makkunatigit:

- errorsinermi erngup kissassusaata appartikkiartuaarnera tamassa ingerlarsorfiuvoq. Assersuutigalugu ingerlatseqatigiiffik Novozymesip maannamut angoreerpaa errortanik ”qalaassisoqarsinnaasoq” naak imeq 30 gradiinnarnik kissassuseqaraluartoq. Ivittuut kommuneqarfianni Ikkat kangerluani misissuisartunik oqaloqateqartarnikkut paasivara Ikkat kangerluani sukaasarsuit sananeqaatinik kaanngartiteralutillu katiterisinnaasunik Novozymesip atortagaanut pitsaanerpaanut nallersuussinnaasunik ”sukat” pinngorafiusut. Allaat ilimagineqarpoq Ikkat kangerluanni peqatugut errorsinermi imeq 40 gradimik kissassusilik 20 gradimik kissassusilimmut appartinneqarsinnaaneranut atorsinnaasunik. Taama atuisinnaaneq aammaanneqarpat assersuutissaavoq Danmarkimi inoqutigiit 100.000 ukiumut innaallagissamik atuinerattut annertutiginerarneqarmat.
- Suliffissuit inuussutissalerinermik ingerlataqartut tunisassiornermi kissassutsimut appartiterisinnaasunik soqutiginninnerat annertusiartuaarsinnarpoq. Tamatumuuna

eqqiluisarneq pitsaanerusoq qulakkeerneqarsinnaammat nerisassatullu tunisassiat mamassusaat allanngutsaalioruminarnerussammat.

- Silap kiatsikkiartornerata ilaatigut malitsigaa naatitat amerlanerujartuinnartut issittumi naatinneqarsinnaaleriartornerat. Misissuinerillu ilaatigut takutippaat nunatsinni issoq soorlu kartofilinik naatitsiviusartoq tappiorannartunik akoqartoq naatsitanut ajoqqusiisinnaasunut illersuutaasunik.

...suli allarpassuarnik assersuutissaqarpoq Kalaallit Nunatta uumassuseqartutigut pisoorsuuneranut takussutissanik.

Taamani NunaBiotech pilersinniarnearaluarimat peqataasut makkuupput: Namminersornerutik Oqartussat, Sulisa A/S, Bioneer A/S aamma DTU Innovation.

Bioneer A/S-illi soqutiginninnerminik allannguinerata malitsigisaanik DTU Innovation Nuna Biotechimik pilersitsiniaqataanerminut tunuarpoq tamatumalu malitsigisaanik pisimassooq suliniut sammiveeruttutut inissimalersorinarmat.

Nunatsinnut iluaqutaasumik NunaBiotechitut ittup pilersinnissaanut soqutiginninneq sumi tamani tusarsaavoq. Naalakkersuisummi?

Kissaatigaara apeqquteqaammut naalakkersuisut akissutissaat tigoreersimassallugu kingusinnerpaamik 15. august 2008.